

1358

筠

谿

集

五

詳校官庶吉士臣瑚圖禮

侍讀臣孫球覆勘

總校官庶吉士臣倉聖脉

校對官典簿臣郭祚熾

謄錄監生臣查浩

欽定四庫全書

筠谿集卷十

宋 李彌遜 撰

議古

魏武破袁紹

建安五年曹公軍官渡袁紹依沙塹為屯東西數十里
公亦分營與相當合戰不利時公兵不滿萬傷者十二
三紹復進臨官渡起土山地道公亦於內作之以相應
紹射營中矢如雨下行者皆蒙楯衆大懼時公糧少與

荀彧書議欲還許彧以為紹悉衆聚官渡欲與公決勝敗公以至弱當至彊若不能制必為所乘是天下之大機也且紹布衣之雄也能聚人而不能用法以公之神武明哲而輔以大順何向而不濟公從之紹運穀車數千乘至公用荀攸計遣徐晃史渙邀擊大破之盡燒其車公與紹相拒連月雖此戰斬將然衆少糧盡士卒疲乏公謂運者曰却十五日為汝破紹不復勞汝矣冬十月紹遣軍運穀使淳于瓊等五人將兵萬餘人送之宿紹

營北四十里紹謀臣許攸貪財紹不能足來奔因說公擊瓊等左右疑之荀攸賈詡勸公公乃留曹洪守自將步騎五千人夜往會明至瓊望見公兵少出陣門外公急擊之瓊退保營遂攻之紹遣騎救瓊左右或言賊騎稍進請分兵拒之公怒曰賊在背後乃白士卒皆殊死戰大破瓊等皆斬之紹初聞公之擊瓊謂長子譚曰就彼攻瓊等吾攻拔其營彼固無所歸矣乃使張郃高覽攻曹洪郃等聞瓊破遂來降紹衆大潰紹及譚弃軍走

渡河追之不及盡收其輜重圖書珍寶虜其衆冀州諸郡多舉城邑降者初桓帝時有黃星見於楚宋之分遼東殷馗善天文言後五十歲當有真人起於梁沛之間其鋒不可當至是凡五十年而公破紹天下莫敵矣

議曰昆陽淝水之戰皆以孤軍抗百萬之師將士戮力以乘天時一舉而王業定官渡之役向使視衆寡為強弱料虛實為勝負謀士不盡其智戰士不竭其力臨敵卻顧務為苟全則指揮

之間成敗分矣漢楚之勢決於鴻溝利害無以
易此荀彧一言而魏武之功成方之良平不為
過也

魏武征三郡烏丸

建安十年袁尚袁熙奔三郡烏丸曹公將征之鑿渠自
呼沱入泝水名平虜渠又從洵河口鑿入潞河名泉州
渠以通海十二年北征三郡烏丸諸將皆曰袁尚亡虜
耳夷狄貪而無親豈為尚困今深入征之劉備必說劉

表以襲許萬一為變事不可悔惟郭嘉策表必不能任
備勸公行夏五月至無終秋七月大水傍海道不通田
疇請為鄉導公從之引軍出盧龍塞塞外道絕不通乃
塹山堙谷五百餘里經白檀歷平剛涉鮮卑庭東指柳
城未至二百里虜乃知之尚熙與蹋頓遼西單于樓班
右北平單于能臣抵之等將數萬騎逆軍八月登白狼
山卒與虜遇衆甚盛公車重在後被甲者少左右皆懼
公登高望虜陣不整乃縱兵擊之使張遼為先鋒虜衆

筠谿集

議曰夷狄遠在要荒之外可以威懷而不可以
利畜異時中國強盛乘勝深入擣其腹心使之
落膽內附固不為難一失其御則倒持太阿彼
將來乘我矣故王者之治遠人不服則修文德
以來之又曰內修政事外攘夷狄未聞以中國
之大萬民之衆而受制於夷狄者也魏武行三
郡如歸市致熙尚如拉枯可謂英武矣然天下
未定勒兵遠掠深入它人之境乘危攻堅徼倖

一勝亦兵家之所忌有德者所不為也

荀彧郭嘉言曹袁勝敗

袁紹與曹操書辭語驕慢謂荀彧郭嘉曰今將討不義而力不敵何如對曰劉項之不敵公所知也漢祖惟智勝項羽故羽雖強終為所禽今紹有十敗紹雖強無能為也紹繁禮多儀公體任自然此道勝也紹以逆動公奉順以率天下此義勝也桓靈以來政失於寬以寬濟寬故不懾公糾之以猛而天下知制此治勝也紹外寬

內忌用人而疑之所任唯親戚子弟公外易簡而內機
明用人無疑惟才所宜不問遠近比度勝也紹多謀少
決失在後事公策得輒行應變無窮此謀勝也紹因累
世之資高議揖讓以收名譽士之好信飾外者多歸之
公以至心待人不為虛美士之忠正遠見而有實者皆
願為用此德勝也紹見人饑寒恤念之形於顏色其所
不見慮或不及公於目前小事時有所忽至於大事與
四海接恩之所加皆過其望雖所不見慮無不周比仁

勝也紹大臣爭權讒言惑亂公御下以道浸潤不行此明勝也紹是非不可知公所是進之以禮所不是正之以法此文勝也紹好為虛勢不知兵要公以少克衆用兵如神軍人恃之敵人畏之此武勝也操笑曰如卿所言孤何德以堪之

議曰自古創業之君中興之主必有英資明略足以駕御豪傑馴服姦雄然後王業可定至其陳師鞠旅攻城掠地一勝一敗未可以得失論

也故高帝厄於鴻門敗於睢水圍於滎陽獨以
寬大長者誅不義立有功與天下同利遂有海
內漢末羣雄競逐分鋒爭雄以窺神器袁紹魏
武才略相去顧何啻倍蓰耶至荀郭之稱則未
免於諛然而善乎其論勝敗也

陳羣勸魏明帝罷力役

魏青龍三年帝好土功既作許昌宮又治洛陽宮起昭
陽太極殿築總章觀高十餘丈力役不已農桑失業司

空陳羣上疏曰昔劉備自成都至白水多作傳舍興費人役太祖知其疲民也今中國勞力亦吳蜀之所願此安危之機也帝答曰王業宮室亦宜並立滅賊之後但當罷守禦耳豈可復興役耶是固君之職蕭何之大畧也羣曰昔漢祖唯與項羽爭天下羽已滅宮室燒焚是以蕭何建武庫太倉皆是要急然高祖猶非其壯麗今二虜未平誠不宜與古同也漢明帝欲起德陽殿鍾離意諫即用其言後乃復作之殿成謂羣臣曰鍾離尚書